

百喻经

僧伽斯那

文硕阁

wenshuoge.com

目录

关于我们	3
卷一	5
卷二	11
卷三	16
卷四	23

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

卷一

愚人食盐喻，愚人集牛乳喻，以梨打破头喻，妇诈语称死喻，渴见水喻，子死欲停置家中喻，认人为兄喻，山羌偷官库喻叹父德行喻，三重楼喻，婆罗门杀子喻煮黑石蜜浆喻，说人喜瞋喻，杀商主祀天喻，医与王女药令卒长大喻，灌甘蔗喻债半钱喻，就楼磨刀喻，乘船失釭喻人说王纵暴喻，妇女欲更求子喻。

（一）愚人食盐喻。

昔有愚人至於他家。主人与食嫌淡无味。主人闻已更为益盐。既得盐美。便自念言：所以美者缘有盐故。少有尚尔况复多也。愚人无智便空食盐。食已口爽返为其患。譬彼外道闻节饮食可以得道。即便断食或经七日或十五日。徒自困饿无益於道。如彼愚人。以盐美故。而空食之。致令口爽。此亦复尔。

（二）愚人集牛乳喻。

昔有愚人将会宾客。欲集牛乳以拟供设。而作是念。我今若豫於日日中[W195]取牛乳。牛乳渐多卒无安处。或复酢败。不如即就牛腹盛之。待临会时当顿[W195]取。作是念已便捉牯牛母子。各系异处。卻後一月尔乃设会迎置宾客。方牵牛来欲[W169]取乳。而此牛乳即乾无有。时为众宾或瞋或笑。愚人亦尔。欲修布施。方言待我大有之时，然後顿施。未及聚顷或为县官水火盗贼之所侵夺。或卒命终不及时施。彼亦如是，

（三）以梨打头破喻。

昔有愚人头上无毛。时有一人以梨打头。乃至二三悉皆伤破。时此愚人默然忍受不知避去。傍人见已而语之言：何不避去乃往受打致使头破。愚人答言：如彼人者憍慢恃力痴无智慧。见我头上无有发毛谓为是石。以梨打我头破乃尔。傍人语言：汝自愚痴云何名彼以为痴也。汝若不痴为他所打。乃至头破不知逃避。比丘亦尔。不能具修信戒闻慧。但整威仪以招利养。如彼愚人被他打头不知避去。乃至伤破反谓他痴。此比丘者亦复如是，

（四）妇诈称死喻。

昔有愚人。其妇端正。情甚爱重。妇无直信後於中间共他交往。邪淫心盛欲逐傍夫舍离己婿。於是密语一老母言：我去之後。汝可赍一死妇女尸安著屋中。语我夫言：云我已死。老母於後伺其夫主不在之时，以一死尸置其家中。及其夫还。老母语言汝妇已死。夫即往视信是已妇哀哭懊恼。大?薪油烧取其骨。以囊盛之昼夜怀挟。妇於後时心厌傍夫便还归家。语其夫言：我是汝妻。夫答之言：我妇久死。汝是阿

谁妄言我妇。乃至二三犹故不信。如彼外道闻他邪说心生惑著。谓为真实永不可改。虽闻正教不信受持。

（五）渴见水喻。

过去有人。痴无智慧。极渴须水。见热时焰谓为是水。即便逐走至辛头河。既至河所对视不饮。傍人语言：汝患渴逐水。今至水所何故不饮。愚人答言：君可饮尽。我当饮之。此水极多俱不可尽。是故不饮。尔时众人闻其此语。皆大嗤笑。譬如外道僻取其理。以己不能具持佛戒。遂便不受。致使将来无得道分流转生死。若彼愚人见水不饮为时所笑。亦复如是，

（六）子死欲停置家中喻。

昔有愚人养育七子。一子先死。时此愚人见子既死。便欲停置於其家中。自欲弃去。傍人见已而语之言：生死道异当速庄严致於远处而殡葬之。云何得留自欲弃去。尔时愚人闻此语已即自思念。若不得留要当葬者，须更杀一子停担两头乃可胜致。於是便更杀其一子。而檐负之远葬林野。时人见之深生嗤笑怪未曾有。譬如比丘私犯一戒。情慚改悔。默然覆藏自说清淨。或有知者即语之言：出家之人守持禁戒如护明珠不使缺落。汝今云何违犯所受欲不忏悔。犯戒者言：苟须忏者更就犯之然後当出。遂便破戒多作不善。尔乃顿出。如彼愚人一子既死又杀一子。今此比丘亦复如是，

（七）认人为兄喻。

昔有一人形容端正智慧具足。复多钱财举世人间无不称叹。时有愚人见其如此便言我兄。所以尔者彼有钱财须者则用之是故为兄。见其还债言非我兄。傍人语言汝是愚人。云何须财名他为兄。及其债时复言非兄。愚人答言：我以欲得彼之钱财认之为兄。实非是兄。若其债时则称非兄。人闻此语无不笑之。犹彼外道。闻佛善语贪窃而用以为己有。乃至傍人教使修行不肯修行。而作是言：为利养故取彼佛语化道众生。而无实事云何修行。犹向愚人为得财故言是我兄。及其债时复言非兄。此亦如是，

（八）山羌偷官库喻。

过去之世有一山羌。偷王库物而远逃走。尔时国王遣人四出推寻捕得将至王边。王即责其所得衣处。山羌答言：我衣乃是祖父之物。王遣著衣实非山羌。本所有故不知著之。应在手者著於脚上。应在腰者返著头上。王见贼已集诸臣等。共详此事而语之言：若是汝之祖父已来所有衣者应当解著。云何颠倒用上为下。以不解故。定知汝衣必是偷得非汝旧物。借以为譬。王者如佛宝藏如法。愚痴羌者犹如外道。窃

听佛法著已法中。以为自有然不解故布置佛法迷乱上下。不知法相。如彼山羌得王宝衣。不识次第颠倒而著。亦复如是，

（九）叹父德行喻。

昔时有人於众人中。叹己父德而作是言：我父慈仁不害不盗。直作实语兼行布施。时有愚人闻其此语便作是念言：我父德行复过汝父。诸人问言：有何德行请道其事。愚人答曰：我父小来断绝淫欲初无染污。众人语言若断淫欲云何生汝。深为时人之所怪笑，犹如世间无智之流。欲赞人德不识其实。反致毁訾如彼愚者，意好叹父言成过失此亦如是，

（一〇）三重楼喻。

往昔之世有富愚人痴无所知。到馀富家见三重楼。高广严丽轩敞疏朗。心生渴仰即作是念。我有财钱不减於彼。云何顷来而不造作如是之楼。即唤木匠而问言曰：解作彼家端正舍不。木匠答言：是我所作。即便语言：今可为我造楼如彼。是时木匠即便经地垒塹作楼。愚人见其垒塹作舍犹怀疑惑不能了知。而问之言：欲作何等。木匠答言：作三重屋。愚人复言：我不欲下二重之屋。先可为我作最上屋。木匠答言：无有是事。何有不作最下重屋而得造彼第二之屋。不造第二云何得造第三重屋。愚人固言：我今不用下二重屋。必可为我作最上者，时人闻已便生怪笑。咸作此言：何有不造下第一屋而得上者，譬如世尊四辈弟子。不能精勤修敬三宝。懒惰懈怠欲求道果。而作是言：我今不用馀下三果。唯求得彼阿罗汉果。亦为时人之所嗤笑。如彼愚者等无有异。

（一一）婆罗门杀子喻。

昔有婆罗门自谓多知。於诸星术种种技艺无不明达恃已如此。欲显其德遂至他国。抱儿而哭。有人问婆罗门言：汝何故哭。婆罗门言：今此小儿七日当死。愍其夭折以是哭耳。时人语言：人命难知计算喜错。设七日头或能不死。何为豫哭。婆罗门言：日月可闇星宿可落。我之所记终无违失。为名利故至七日头自杀其子以证己说。时诸世人卻後七日闻其儿死。咸皆叹言真是智者所言不错。心生信服悉来致敬，犹如佛之四辈弟子为利养故自称得道。有愚人法杀善男子诈现慈德。故使将来受苦无穷。如婆罗门为验己言杀子惑世。

（一二）煮黑石蜜浆喻。

昔有愚人煮黑石蜜。有一富人来至其家。时此愚人便作是念。我今当取黑石蜜浆与此富人即著少水用置火中。即於火上以扇扇之望得使冷。傍人语言下不止火扇之不已云何得冷。尔时人众悉皆嗤笑。其犹外道不灭烦恼炽然之火。少作苦行卧棘刺上

。五热炙身而望清凉寂静之道。终无是处。徒为智者之所怪笑。受苦现在殃流来劫。

（一三）说人喜瞋喻。

过去有人。共多人众坐於屋中。叹一外人德行极好。唯有二过。一者喜瞋。二者作事仓卒。尔时此人过在门外闻作是语便生瞋恚。即入其屋擒彼道已愚恶之人以手打扑。傍人问言何故打也。其人答言：我曾何时喜瞋仓卒。而此人者道。我顺喜瞋恚。作事仓卒。是故打之。傍人语言：汝今喜瞋仓卒之相即时现验。云何讳之。人说过恶而起怨责。深为众人怪其愚惑。譬如世间饮酒之夫。耽荒沈酒作诸放逸。见人呵责返生尤疾。苦引证作用自明白。若此愚人讳闻己过。见他道说返欲打扑之。

（一四）杀商主祀天喻。

昔有贾客欲入大海。入大海之法要须导师然後可去。即共求觅得一导师。既得之已相将发引至旷野中。有一天祠当须人祀然後得过。於是众贾共思量言：我等伴党尽是亲亲如何可杀。唯此导师中用祀天。即杀导师以用祭祀。祀天已竟迷失道路不知所趣穷困死尽。一切世人亦复如是，欲入法海取其珍宝。当修善法行以为导师。毁破善行。生死旷路永无出期。经历三涂受苦长远。如彼商贾将入大海。杀其导师迷失津济终致困死。

（一五）医与王女药令卒长大喻。

昔有国王产生一女。唤医语言：为我与药立使长大。医师答言：我与良药能使即大。但今卒无方须求索。比得药顷王要莫看。待与药已然後示王。於是即便远方取药经十二年。得药来还与女令服将示於王。王见欢喜即自念言：实是良医。与我女药能令卒长。便敕左右赐以珍宝。时诸人等笑王无智。不晓筹量生来年月。见其长大。谓是药力。世人亦尔。诣善知识而启之言：我欲求道愿见教授。使我立得善知识。师以方便故教令坐禅观十二缘起。渐积众德获阿罗汉。倍踊跃欢喜而作是言：快哉大师。速能令我证最妙法。

（一六）灌甘蔗喻。

昔有二人共种甘蔗。而作誓言：种好者赏。其不好者当重罚之。时二人中。一者念言：甘蔗极甜。若压取汁还灌甘蔗树。甘美必甚得胜於彼。即压甘蔗取汁用溉冀望滋味。返败种子所有甘蔗一切都失。世人亦尔。欲求善福恃己豪贵。专形挟势迫胁下民陵夺财物。用作福本期善果。不知将来反获其患殃。如压甘蔗彼此都失。

（一七）债半钱喻。

往有商人贷他半钱久不得偿。即便往债前有大河。雇他两钱然後得渡。到彼往债竟不得见。来还渡河复雇两钱。为半钱债而失四钱。兼有道路疲劳乏困。所债甚少所失极多。果被众人之所怪笑。世人亦尔。要少名利致毁大行。苟容己身不顾礼义。现受恶名後得苦报。

（一八）就楼磨刀喻。

昔有一人。贫穷困苦为王作事。日月经久身体羸瘦。王见怜愍赐一死驼。贫人得已即便剥皮。嫌刀钝故求石欲磨。乃於楼上得一磨石。磨刀令利来下而剥。如是数数往来磨刀。後转劳苦憚不能数上。悬驼上楼就石磨刀。深为众人之所嗤笑，犹如愚人毁破禁戒。多取钱财以用修福望得生天。如悬驼上楼磨刀用功甚多所得甚少。

（一九）乘船失釭喻。

昔有人乘船渡海。失一银釭堕於水中。即便思念。我今画水作记。舍之而去後当取之。行经二月到师子诸国。见一河水便入其中觅本失釭。诸人问言：欲何所作。答言：我先失釭今欲觅取。问言：於何处失。答言：初入海失。又复问言：失经几时。言失来二月。问言：失来二月。云何此觅。答言：我失釭时画水作记。本所画水与此无异。是故觅之。又复问言：水虽不别汝昔失时乃在於彼。今在此觅何由可得。尔时众人无不大笑。亦如外道不修正行。相似善中横计苦困。以求解脱，犹如愚人失釭於彼而於此觅。

（二〇）人说王纵暴喻。

昔有一人说王过罪。而作是言：王甚暴虐治政无理。王闻是语即大瞋恚。竟不究悉。谁作此语。信傍佞人捉一贤臣。仰使剥脊取百两肉。有人证明此无是语。王心便悔索千两肉用为补脊。夜中呻唤甚大苦恼。王闻其声问言：何以苦恼取汝百两。十倍与汝。意不足耶。何故苦恼。傍人答言：大王如截子头。虽得千头不免子死。虽十倍得肉。不免苦痛。愚人亦尔。不畏後世贪渴现乐苦切众生。调发百姓多得财物。望得灭罪而得福报。譬如彼王割人之脊。取人之肉。以馀肉补。望使不痛无有是处。

（二一）妇女欲更求子喻。

往昔世时有妇女人。始有一子更欲求子问馀妇女。谁有能使我重有子。有一老母语此妇言：我能使尔求子可得。当须祀天。问老母言：祀须何物。老母语言：杀汝之子取血祀天必得多子。时此妇女便随彼语欲杀其子。傍有智人嗤笑骂詈。愚痴无智乃至如此。未生子者竟可得。而杀现子。愚人亦尔为未生乐自投火坑。种种害身为得生天百喻经卷第一。

闻如是，一时佛在王舍城。在鹄封竹园。与诸大比丘菩萨摩訶萨及诸八部三万六千人俱。是时会中有异学梵志五百人俱。从座而起白佛言：吾闻佛道洪深无能及者，故来归问唯愿说之。佛言甚善。问曰：天下为有有无。答曰：亦有亦无。梵志曰：如今有者云何言无。如今无者云何言有。答曰：生者言有死者言无。故说或有或无。问曰：人从何生。答曰：人从穀而生。问曰：五穀从何而生。答曰：五穀从四大火风而生。问曰：四大火风从何而生。答曰：四大火风从空而生。问曰：空从何生。答曰：从无所有生。问曰：无所有从何而生。答曰：从自然生。问曰：自然从何而生。答曰：从泥洹而生。问曰：泥洹从何而生。佛言：汝今问事何以尔深。泥洹者是不生不死法。问曰：佛泥洹未。答曰：我未泥洹。若未泥洹云何得知泥洹常乐。佛言：我今问汝。天下众生为苦为乐。答曰：众生甚苦。佛言：云何名苦。答曰：我见众生死时苦痛难忍。故知死苦。佛言：汝今不死亦知死苦。我见十方诸佛不生不死故知泥洹常乐。五百梵志心开意解求受五戒。悟须陀洹果。复坐如故。佛言：汝等善听。今为汝广说众喻。

卷二

入海取沈水喻，贼盗锦绣用裹■褐喻。种熬胡麻子喻，水火喻，人效王眼?喻。治鞭疮喻，为妇贸鼻喻，贫人烧粗褐衣喻。牧羊人喻，雇借瓦师喻，估客偷金喻。

斫树取果喻，送美水喻，宝篋镜喻，破。五通仙眼喻，杀群牛喻，饮木笕水喻，见。他人涂舍喻，治秃喻，毗舍闍鬼喻。（二二）入海取沈水喻。

昔有长者子。入海取沈水积有年载。方得一车持来归家。诣市卖之以其贵故卒无买者，经历多日不能得售。心生疲厌以为苦恼。见人卖炭时得速售。便生念言：不如烧之作炭可得速售。即烧为炭诣市卖之。不得半车炭之价直。世间愚人亦复如是，无量方便勤行精进仰求佛果。以其难得便生退心。不如发心求声闻果速断生死作阿罗汉。

（二三）贼偷锦绣用裹■褐喻。

昔有贼人入富家舍。偷得锦绣即持用裹故弊■褐种种财物。为智人所笑。世间愚人亦复如是，既有信心入佛法中修行善法及诸功德。以贪利故破於清淨戒及诸功德。为世所笑亦复如是，

（二四）种熬胡麻子喻昔有愚人。生食胡麻子以为不美。熬而食之为美。便生念言：不如熬而种之後得美者，便熬而种永无生理。世人亦尔。以菩萨旷劫修行因难行苦行以为不乐。便作念言：不如作阿罗汉速断生死其功甚易。後欲求佛果终不可得。如彼焦种无复生理。世间愚人亦复如是，

（二五）水火喻。

昔有一人事须火用及以冷水。即便宿火以澡灌盛水置於火上。後欲取火而火都灭。欲取冷水而水复热。火及冷水二事俱失。世间之人亦复如是，入佛法中出家求道。既得出家还复念其妻子眷属。世间之事五欲之乐。由是之故失其功德之火持戒之水。念欲之人亦复如是，

（二六）人效王眼?喻。

昔有一人。欲得王意。问余人言云何得之。有人语言：若欲得王意者，王之形相汝当效之。此人即便後至王所。见王眼?便效王?。王问之言：汝为病耶。为著风耶。何以眼?。其人答王。我不病眼。亦不著风。欲得王意。见王眼?故效王也。王闻是语即大瞋恚。即便使人种种加害摈令出国。世人亦尔。於佛法王欲得亲近。求其善法以自增长。既得亲近。不解如来法王为众生故种种方便现其阙短。或闻其法见有

字句不正。便生讥毁。效其不是。由是之故。於佛法中永失其善墮於三恶。如彼效王。亦复如是，

（二七）治鞭疮喻。

昔有一人。为王所鞭。既被鞭已，以马屎拊之欲令速差。有愚人见之心生欢喜。便作是言：我决得是治疮方法。即便归家语其儿言：汝鞭我背。我得好法今欲试之。儿为鞭背以马屎拊之以为善巧。世人亦尔。闻有人言修不净观。即得除去五阴身疮。便作是言：我欲观於女色及以五欲。未见不净。返为女色之所惑乱。流转生死墮於地狱。世间愚人亦复如是，

（二八）为妇贸鼻喻。

昔有一人。其妇端正唯其鼻鬼。其人出外见他妇女面貌端正其鼻甚好。便作念言：我今宁可截取其鼻著我妇面上不亦好乎。即截他妇鼻持来归家急唤其妇。汝速出来与汝好鼻。其妇出来即割其鼻。寻以他鼻著妇面上。既不相著复失其鼻。唐使其妇受大苦痛。世间愚人亦复如是，闻他宿旧沙门婆罗门有大名德而为世人之所恭敬得大利养。便作是念言：我今与彼便为不异。虚自假称。妄言有德。既失其利。复伤其行。如截他鼻徒自伤损。世间愚人亦复如是，

（二九）贫人烧粗褐衣喻。

昔有一人。贫穷困乏。与他客作得粗褐衣而被著之。有人见之而语之言：汝种姓端正贵人之子。云何著此粗弊衣褐。我今教汝当使汝得上妙衣服。当随我语终不欺汝。贫人欢喜敬从其言：其人即便在前然火。语贫人言：今可脱此粗褐衣著於火中。於此烧处当使汝得上妙钦服。贫人即便脱著火中。既烧之後於此火处求觅钦服都无所得。世间之人亦复如是，从过去身修诸善法得此人身。应当保护进德修业。乃为外道邪恶妖女之所欺诳。汝今当信我语修诸苦行。投岩赴火舍是身已，当生梵天长受快乐。使用其语即舍身命。身死之後墮於地狱备受诸苦。既失人身空无所获。如彼贫人亦复如是，

（三〇）牧羊人喻。

昔有一人。巧於牧羊其羊滋多。乃有千万极大慳贪不肯外用。时有一人善於巧诈。便作方便往共亲友而语之言：我今共汝极成亲爱。便为一体更无有异。我知彼家有一好女。当为汝求可用为妇。牧羊之人闻之欢喜。便大与羊及诸财物。其人复言汝妇今日已生一子。牧羊之人未见於妇。闻其已生心大欢喜重与彼物。其人後复而语之言：汝儿生已今死矣。牧羊之人闻此人语。便大啼泣嘘歔不已，世间之人亦复如是，既修多闻为其名利祕惜其法。不肯为人教化演说。为此漏身之所诳惑妄期世乐

。如己妻息为其所欺。丧失善法。後失身命并及财物。便大悲泣生其忧苦。如彼牧羊之人亦复如是，

（三一）雇借瓦师喻。

昔有婆罗门师。欲作大会语弟子言：我须瓦器以供会用。汝可为我雇借瓦师诣市觅之。时彼弟子往瓦师家。时有一人。驴负瓦器至市欲卖。须臾之间驴尽破之。还来家中啼哭懊恼。弟子见已而问之言：何以悲叹懊恼如是，其人答言：我为方便勤苦积年始得成器。诣市欲卖。此弊恶驴。须臾之顷尽破我器。是故懊恼。尔时弟子见闻是已欢喜而言：此驴乃是佳物。久时所作须臾能破。我今当买此驴。瓦师欢喜即便卖与。乘来归家。师问之言：汝何以不得瓦师将来。用是驴为。弟子答言：此驴胜於瓦师。瓦师久时所作瓦器少时能破。时师语言：汝大愚痴无有智慧。此驴今者適可能破。假使百年不能成一。世间之人亦复如是，虽千百年受人供养都无报偿。常为损害。终不为益。背恩之人亦复如是，

（三二）估客偷金喻。

昔有二估客。共行商贾。一卖真金。其第二者卖兜罗绵。有他买真金者烧而试之，第二估客即便偷他被烧之金。用兜罗绵裹。时金热故烧绵都尽。情事既露二事俱失。如彼外道偷取佛法著己法中。妄称己有。非是佛法。由是之故烧灭外典不行於世。如彼偷金事情都现。亦复如是，

（三三）斫树取果喻。

昔有国王。有一好树高广极大当生胜果香而甜美。时有一人来至王所。王语之言：此之树上将生美果。汝能食不。即答王言：此树高广虽欲食之何由能得。即便断树望得其果。既无所获徒自劳苦。後还欲竖。树已枯死都无生理。世间之人亦复如是，如来法王有持戒树。能生胜果心生愿乐。欲得果食应当持戒。修诸功德不解方便。返毁其禁如彼伐树。复欲还活都不可得。破戒之人亦复如是，

（三四）送美水喻。

昔有一聚落。去王城五由旬。村中有好美水。王敕村人。常使日日送其美水。村人疲苦悉欲移避远此村去。时彼村主语诸人言：汝等莫去。我当为汝白王改五由旬作三由旬。使汝得近往来不疲。即往白王。王为改之作三由旬。众人闻已便大欢喜。有人语言：此故是本五由旬更无有异。虽闻此言信王语故终不肯舍。世间之人亦复如是，修行正法度於五道向涅槃城。心生厌倦。便欲舍离。顿驾生死不能复进。如来法王有大方便。於一乘法分别说三。小乘之人闻之欢喜以为易行。修善进德求度生死。後闻人说无有三乘。故是一道。以信佛语终不肯舍。如彼村人亦复如是，

（三五）宝篋镜喻。

昔有一人。贫穷困乏。多负人债无以可偿。即便逃避至空旷处。值篋满中珍宝。有一明镜著珍宝上以盖覆之。贫人见已，心大欢喜。即便发之见镜中人。便生惊怖。叉手语言：我谓空篋都无所有。不知有君在此篋中。莫见瞋也。凡夫之人亦复如是，为无量烦恼之所穷困。而为生死魔王债主之所缠著。欲避生死入佛法中修行善法作诸功德。如值宝篋。为身见镜之所惑乱。妄见有我。即便封著。谓是真实。於是堕落失诸功德禅定道品无漏诸善三乘道果一切都失。如彼愚人弃於宝篋。著我见者亦复如是，

（三六）破五通仙眼喻。

昔有一人。入山学道得五通仙。天眼彻视能见地中一切伏藏种种珍宝。国王闻之。心大欢喜便语臣言：云何得使此人常在我国不馀处去。使我藏中得多珍宝。有一愚臣辄便往至。挑仙人双眼持来白王。臣以挑眼更不得去常住是国。王语臣言：所以贪得仙人住者，能见地中一切伏藏。汝今毁眼何所复任。世间之人亦复如是，见他头陀苦行山林旷野冢间树下。修四意止及不净观。便强将来於其家中种种供养。毁他善法使道果不成。丧其道眼已失其利空无所获。如彼愚臣唐毁他目也。

（三七）杀群牛喻。

昔有一人。有二百五十头牛。常驱逐水草随时餒食。时有一虎啖食一牛。尔时牛主即作念言：已失一牛俱不全足。用是牛为。即便驱至深坑高岸。排著坑底尽皆杀之。凡夫愚人亦复如是，受持如来具足之戒。若犯一戒不生惭愧清净忏悔。便作念言：我已破一戒。既不具足。何用持为。一切都破无一在者，如彼愚人尽杀群牛无一在者，

（三八）饮木箭水喻。

昔有一人。行来渴乏见木箭中有清淨流水。就而饮之。饮水已足即便举手语木箭言：我已饮竟。水莫复来。虽作是语水流如故。便瞋恚言我已饮竟。语汝莫来。何以故来。有人见之言：汝大愚痴无有智慧。汝何以不去。语言莫来即为挽卻牵馀处去。世间之人亦复如是，为生死渴爱。饮五欲咸水。既为五欲之所疲厌。如彼饮足。便作是言：汝色声香味莫复更来使我见也。然此五欲相续不断。既见之已便复瞋恚。语汝速灭莫复更生。何以故来使我见之。时有智人而语之言：汝欲得离者当摄汝六情闭其心意。妄想不生便得解脱。何必不见欲使不生如彼饮水愚人等无有异。

（三九）见他人涂舍喻。

昔有一人。往至他舍。见他屋舍墙壁涂治。其地平正清淨甚好。便问之言：用何和涂得如是好。主人答言：用稻穀<麦戈>水浸令熟和泥涂壁故得如是，愚人即便而作念言：若纯以稻<麦戈>不如合稻而用作之。壁可白淨泥始平好。便用稻穀和泥用涂其壁望得平正。返更高下。壁都劈裂。虚弃稻穀都无利益。不如惠施可得功德。凡夫之人亦复如是，闻圣人说法修行诸善。舍此身已可得生天及以解脱。便自杀身望得生天及以解脱。徒自虚丧空无所获。如彼愚人。

（四〇）治秃喻。

昔有一人。头上无毛。冬则大寒夏则患热。兼为蚊虻之所咬食。昼夜受恼。甚以为苦。有一医师多诸方术。时彼秃人往至其所语其医言：唯愿大师为我治之。时彼医师亦复头秃。即便脱帽示之而语之言：我亦患之以为痛苦。若令我治能得差者，应先自治以除其患。世间之人亦复如是，为生老病死之所侵恼。欲求长生不死之处。闻有沙门婆罗门等世之良医善疗众患。便往其所而语之言：唯愿为我除此无常生死之患。常处安乐长存不变。时婆罗门等即便报言：我亦患此无常生老病死。种种求觅长存之处终不能得。今我若能使汝得者，我亦应先自得。令汝亦得。如彼患秃之人徒自疲劳不能得差。

（四一）毗舍阁鬼喻。

昔有二毗舍阁鬼。共有一篋一杖一屐。二鬼共诤各各欲得。二鬼纷纭竟日不能使平。时有一人来见之已而问之言：此篋杖屐有何奇异。汝等共诤瞋忿乃尔。二鬼答言：我此篋者，能出一切衣服饮食床褥卧具资生之物。尽从中出。执此杖者，怨敌归服无敢与诤。著此屐者，能令人飞行无罣碍。此人闻已即语鬼言：汝等小远我当为尔平等分之。鬼闻其语。寻即远避。此人即时抱篋捉杖蹶屐而飞。二鬼愕然竟无所得。人语鬼言：尔等所诤我已得去。今使尔等更无所诤。毗舍阁者喻於众魔及以外道。布施如篋。人天五道资用之具皆从中出。禅定如杖。消灭魔怨烦恼之贼。持戒如屐。必昇人天。诸魔外道诤篋者喻於有漏中强求果报。空无所得。若能修行善行及以布施持戒禅定。便得离苦获得道果。

卷三

估客驼死喻，磨大石喻，欲食半饼喻，奴守门喻，偷犂牛喻，贫人能作鸳鸯鸣喻，野干为折树枝所打喻，小儿争分别毛喻，医治脊佞喻。

五人买婢共使作喻，伎儿作乐喻，师患脚付二弟子喻，蛇头尾共争在前喻，愿为王剃须喻，索无物喻，踢长者口喻，二子分财喻，观作瓶喻，见水底金影喻，梵天弟子造物因喻，病人食雉肉喻，伎儿著戏罗刹服共相惊怖喻，人谓故屋中有恶鬼喻，五百欢喜丸喻。

（四二）估客驼死喻。

譬如估客游行商贾。会於路中而驼卒死。驼上所载多有珍宝。细软上氎种种杂物。驼既死已即剥其皮。商主舍行坐二弟子而语之言：好看驼皮莫使湿烂。其後天雨二人顽黠尽以好氎覆此皮。上氎尽烂坏皮氎之价理自悬殊。以愚痴故以氎覆皮。世间之人亦复如是，其不杀者喻於白氎。其驼皮者即喻财货。天雨湿烂喻於放逸败坏善行。不杀戒者即佛法身最上妙因。然不能修。但以财货造诸塔庙供养众僧。舍根取末不求其本。漂浪五道莫能自出。是故行者应当精心持不杀戒。

（四三）磨大石喻。

譬如有人。磨一大石勤加功力。经历日月作小戏牛。用功既重所期甚轻。世间之人亦复如是，磨大石者喻於学问精勤劳苦。作小牛者喻於名闻互相是非。夫为学者研思精微博通多识。宜应履行远求胜果。方求名誉憍慢贡高。增长过患。

（四四）欲食半饼喻。

譬如有人。因其饥故食七枚煎饼。食六枚半已便得饱满。其人恚悔以手自打而作是言：我今饱足由此半饼。然前六饼唐自捐弃。设知半饼能充足者应先食之。世间之人亦复如是，从本以来常无有乐。然其痴倒横生乐想。如彼痴人於半番饼生於饱想。世人无知以富贵为乐。夫富贵者求时甚苦。既获得已守护亦苦。後还失之忧念复苦。於三时中都无有乐，犹如衣食遮故名乐。於辛苦中横生乐想。诸佛说言：三界无安。皆是大苦。凡夫倒惑。横生乐想。

（四五）奴守门喻。

譬如有人将欲远行。敕其奴言：尔好守门并看驴索。其主行後。时邻里家有作乐者，此奴欲听不能自安。寻以索系门置於驴上。负至戏处听其作乐。奴去之後。舍中财物贼尽持去。大家行还问其奴言：财宝所在。奴便答言：大家先付门驴及索。自

是以外非奴所知。大家复言：留尔守门正为财物。财物既失用於门为。生死愚人为爱奴仆亦复如是，如来教诫常护根门。莫著六尘守无明驴看於爱索。而诸比丘不奉佛教。贪求利养诈现清白静处而坐。心意流驰贪著五欲。为色声香味之所惑乱。无明覆心爱索缠缚。正念觉意道品。财宝悉皆散失。

（四六）偷犛牛喻。

譬如一村共偷犛牛而共食之。其失牛者逐迹至村。唤此村人问其由状。而语之言：尔在此村。不偷者对曰：我实无村。又问。尔村中有池。在此池边共食牛不。答言无池。又问。池傍有树不。对言无树。又问。偷牛之时在尔村东不。对曰无东。又问。当尔偷牛非日中时耶。对曰无中。又问。纵可无村及以无树。何有天下无东无时。知尔妄语都不可信。尔偷牛食不。对言实食。破戒之人亦复如是。覆藏罪过不肯发露。死入地狱。诸天善神以天眼观不得覆藏。如彼食牛不得欺拒。

（四七）贫人作鸳鸯鸣喻。

昔外国节法庆之日。一切妇女尽持优钵罗华以为鬘饰。有一贫人。其妇语言：尔若能得优钵罗华来用与我。为尔作妻。若不能得我舍尔去。其夫先来常善能作鸳鸯之鸣。即入王池作鸳鸯鸣偷优钵罗华。时守池者而作是问。池中者谁。而此贫人失口答言：我是鸳鸯。守者捉得将诣王所。而於中道复更和声作鸳鸯鸣。守池者言：尔先不作今作何益。世间愚人亦复如是，终身残害作众恶业。不习心行使令调善。临命终时方言：今我欲得修善。狱卒将去付阎罗王。虽欲修善亦无所及已，如彼愚人欲到王所作鸳鸯鸣。

（四八）野干为折树枝所打喻。

譬如野干在於树下风吹枝折堕其脊上。即便闭目不欲看树。舍弃而走到于露地。乃至日暮亦不肯来。遥见风吹大树枝柯动摇上下。便言唤我寻来树下。愚痴弟子亦复如是，已得出家得近师长以小呵责即便逃走。复於後时遇恶知识恼乱不已，方还所去。如是去来是为愚惑。

（四九）小儿争分别毛喻。

譬如昔日有二小儿入河邀戏。於此水底得一把毛。一小儿言此是仙须。一小儿言此是黑毛。尔时河边有一仙人。此二小儿诤之不已，诣彼仙所决其所疑。而彼仙人寻即取米及胡麻子。口中含嚼吐著掌中。语小儿言：我掌中者似孔雀屎。而此仙人不答他问人皆知之。世间愚人亦复如是，说法之时戏论诸法不答正理。如彼仙人不答所问为一切人之所嗤笑。浮漫虚说亦复如是，

（五〇）医治脊伛喻。

譬如有人卒患脊伛请医疗之。医以酥涂。上下著板。用力痛压。不觉双目一时并出。世间愚人亦复如是，为修福故治生估贩。作诸非法其事虽成利不补害。将来之世入於地狱喻双目出。

（五一）五人买婢共使作喻。

譬如五人共买一婢。其中一人语此婢言：与我浣衣。次有一人复语浣衣。婢语次者先与其浣。後者恚曰我共前人。同买於汝。云何独尔。即鞭十下。如是五人各打十下。五阴亦尔。烦恼因缘合成此身。而此五阴恒以生老病死无量苦恼撻答众生。

（五二）伎儿作乐喻譬如伎儿。王前作乐。王许千钱後从王索。王不与之。王语之言：汝向作乐空乐我耳。我与汝钱亦乐汝耳。世间果报亦复如是，人中天上虽受少乐亦无有实。无常败灭不得久住如彼空乐。

（五三）师患脚付二弟子喻。

譬如一师有二弟子。其师患脚。遣二弟子人当一脚随时按摩。其二弟子常相憎嫉。一弟子行其一弟子。捉其所当按摩之脚以石打折。彼既来已忿其如是，复捉其所按之脚寻复打折。佛法学徒亦复如是，方等学者非斥小乘。小乘学者复非方等。故使大圣法典二途兼亡。

（五四）蛇头尾共争在前喻。

譬如有蛇。尾语头言我应在前。头语尾言我恒在前何以卒尔头果在前其尾缠树不能得去。放尾在前即堕火坑烧烂而死。师徒弟子亦复如是，言师耆老每恒在前。我诸年少应为导首。如是年少不闲戒律多有所犯。因即相牵入於地狱。

（五五）愿为王剃须喻。

昔者有王有一亲信。於军阵中没命救王使得安全。王大欢喜与其所愿。即便问言：汝何所求恣汝所欲。臣便答言王剃须时愿听我剃。王言：此事若適汝意听汝所愿。如此愚人世人所笑。半国之治大臣辅相悉皆可得乃求贱业。愚人亦尔。诸佛於无量劫。难行苦行自致成佛。若得遇佛及值遗法人身难得。譬如盲龟值浮木孔。此二难值今已遭遇。然其意劣奉持少戒便以为足。不求涅槃胜妙法也。无心进求自行邪事便以为足。

（五六）索无物喻。

昔有二人道中共行。见有一人将胡麻车在峻路中不能得前。时将车者语彼二人。佐我推车出此峻路。二人答言与我何物。将车者言：无物与汝。时此二人即佐推车至於平地。语将车人言与我物来。答言无物。又复语言：与我无物。二人之中其一人者含笑而言：彼不肯与何足为愁。其人答言：与我无物必应有无物。其一人言无物者二字共合是为假名。世俗凡夫若无物者便生无所有处，第二人言无物者即是无相无愿无作。

（五七）蹋长者口喻。

昔有大富长者，左右之人欲取其意皆尽恭敬。长者唾时。左右侍人以脚蹋卻。有一人愚者，不及得蹋。而作是言：若唾地者诸人蹋卻。欲唾之时，我当先蹋。於是长者正欲咳唾。时此愚人即便举脚蹋长者口。破唇折齿。长者语愚人言：汝何以故蹋我唇口。愚人答言若长者唾出口落地。左右谄者已得蹋去。我虽欲蹋。每常不及。以是之故。唾欲出口举脚先蹋望得汝意。凡物须时时未及到。彊设功力返得苦恼。以是之故世人当知时与非时。

（五八）二子分财喻。

昔摩罗国有一刹利。得病极重。必知定死。诫敕二子。我死之後善分财物。二子随教於其死後分作二分。兄言弟分不平。尔时有一愚老人言教汝分物使得平等。现所有物破作二分。云何破之。所谓衣裳中割作二分罌瓶亦复中破作二分。所有盆瓠亦破作二分。钱亦破作二分。如是一切所有财物尽皆破之而作二分。如是分物人所嗤笑。如诸外道偏修分别论。论门有四种有决定答论门。譬如人一切有皆死此是决定答论门。死者必有生是应分别答。爱尽者无生。有爱必有生。是名分别答论门。有问人为最胜不。应反问言：汝问三恶道为问诸天。若问三恶道人实为最胜。若问於诸天人必为不如。如是等义名反问答论门。若问十四难。若问世界及众生有边无边有终始无终始如是等义。名置答论门。诸外道愚痴自以为智慧。破於四种论作一分分别论。喻如愚人分钱物破钱为两。

（五九）观作瓶喻。

譬如二人至陶师所。观其蹋轮而作瓦瓶看无厌足。一人舍去往至大会极得美膳又获珍宝。一人观瓶而作是言待我看讫。如是渐冉乃至日没观瓶不已失於衣食。愚人亦尔。修理家务不觉非常。

今日营此事，明日造彼业。诸佛大龙出，雷音遍世间。法雨无障碍，缘事故不闻。不知死卒至，失此诸佛会。

不得法珍宝，常处恶道穷。背弃放正法，彼观缘事瓶。终常无竟已，是故失法利。

永无解脱时。

（六〇）见水底金影喻。

昔有痴人往大池所。见水底影有真金像谓呼有金。即入水中挠泥求觅。疲极不得。还出复坐须臾水清又现金色。复更入里挠泥更求觅。亦复不得。其如是父觅子得来见子。而问子言汝何所作疲困如是，子白父言水底有真金我时投水欲挠泥取疲极不得。父看水底真金之影。而知此金在於树上。所以知之。影现水底。其父言曰：必飞鸟衔金著於树上。即随父语上树求得。

凡夫愚痴人，无智亦如是，於无我阴中，横生有我想。如彼见金影，勤苦而求觅。徒劳无所得。

（六一）梵天弟子造物因喻。

婆罗门众皆言：大梵天王是世间父。能造万物。造万物主者有弟子。言我亦能造万物。实是愚痴自谓有智。语梵天言：我欲造万物。梵天王语言：莫作此意汝不能造。不用天语便欲造物。梵天见其弟子所造之物即语之言：汝作头太大作项极小。作手太大作臂极小。作脚极小作踵极大。作如似毗舍闍鬼。以此义当知各各自业所造非梵天能造。诸佛说法不著二边。亦不著断亦不著常。如似八正道说法。诸外道见是断见常事已便生执著。欺诳世间作法形像。所说实是非法。

（六二）病人食雉肉喻。

昔有一人病患委笃。良医占之云须恒食一种雉肉可得愈病。而此病者市得一雉食之已尽更不复食。医於後时见便问之汝病愈未。病者答言医先教我恒食雉肉。是故今者食一雉已尽更不敢食。医复语言若前雉已尽何不更食。汝今云何正食一雉望得愈病。一切外道亦复如是，闻佛菩萨无上良医说言：当解心识。外道等执於常见。便谓过去未来现在唯是一识无有迁谢。犹食一雉。是故不能疗其愚惑烦恼之病。大智诸佛教诸外道除其常见一切诸法念念生灭何有一识常恒不变。如彼世医教更食雉而得病愈。佛亦如是，教诸众生。令得解诸法。坏故不常。续故不断即得划除常见之病。

（六三）伎儿著戏罗刹服共相惊怖喻。

昔乾陀卫国有诸伎儿。因时饥俭。逐食他土经婆罗新山。而此山中素饶恶鬼食人罗刹。时诸伎儿会宿山中。山中风寒然火而卧。伎人之中有患寒者，著彼戏本罗刹之服向火而坐。时行伴中从睡寤者，卒见火边有一罗刹。竟不谛观舍之而走。遂相惊动一切伴侣悉皆逃奔。时彼伴中著罗刹衣者亦复寻逐奔驰绝走。诸同行者见其在後

谓欲加害。倍增惶怖越度山河投赴沟壑。身体伤破疲极委顿。乃至天明方知非鬼。一切凡夫亦复如是，处於烦恼饥俭善法。而欲远求常乐我净无上法食。便於五阴之中横计於我。以我见故流驰生死。烦恼所逐不得自在。坠堕三涂恶趣沟壑。至天明者喻生死夜尽智慧明晓。方知五阴无有真我。

（六四）人谓故屋中有恶鬼喻。

昔有故屋人谓此室常有恶鬼。皆悉怖畏不敢寢息。时有一人自谓大胆。而作是言我欲入此室中寄卧一宿即入宿止。後有一人自谓胆勇胜於前人。复闻傍人言此室中恒有恶鬼。即欲入中排门将前。时先入者谓其是鬼。即复推门遮不听前。在後來者复谓有鬼。二人斗诤遂至天明既相睹已方知非鬼。一切世人亦复如是，因缘暂会无有宰主。一一推析谁是我者，然诸众生横计是非强生诤讼。如彼二人等无差别。

（六五）五百欢喜丸喻。

昔有一妇荒淫无度。欲情既盛嫉恶其夫。每思方策规欲残害。种种设计不得其便。会值其夫。聘使邻国。妇密为计造毒药丸。欲用害夫。诈语夫言：尔今远使虑有乏短。今我造作五百欢喜丸。用为资粮以送於尔。尔若出国至他境界。饥困之时乃可取食。夫用其言：至他界已未及食之。於夜闇中止宿林间畏惧恶兽上树避之。其次欢喜丸忘置树下。即以其夜值五百偷贼。盗彼国王五百疋马并及宝物来止树下。由其逃突尽皆饥渴。於其树下见欢喜丸诸贼取已各食一丸。药毒气盛五百群贼一时俱死。时树上人至天明已见此群贼死在树下。诈以刀箭斫射死尸。收其鞍马并及财宝驱向彼国。时彼国王多将人众案迹来逐。会於中路值於彼王。彼王问言：尔是何人何处得马。其人答言：我是某国人而於道路值此群贼共相斫射。五百群贼今皆一处死在树下。由是之故我得此马及以珍宝来投王国。若不见信可遣往看贼之疮痍杀害处所。王时即遣亲信往看果如其言：王时欣然叹未曾有。既还国已厚加爵赏。大赐珍宝封以聚落。彼王旧臣咸生嫉妒而白王言：彼是远人未可服信。如何卒尔宠遇过厚。至於爵赏逾越旧臣。远人闻已而作是言：谁有勇健能共我试。请於平原校其技能。旧人愕然无敢敌者，後时彼国大旷野中有恶师子。截道杀人断绝王路。时彼旧臣详共议之。彼远人者自谓勇健无能敌者，今复若能杀彼师子为国除害真为奇特。作是议已便白於王。王闻是已给赐刀杖寻即遣之。尔时远人既受敕已坚彊其意向师子所。师子见之奋激鸣吼腾跃而前。远人惊怖即便上树。师子张口仰头向树。其人怖急失所捉刀。值师子口师子寻死。尔时远人欢喜踊跃。来白於王。王倍宠遇。时彼国人卒尔敬服咸皆赞叹。其妇人欢喜丸者喻不净施。王遣使者喻善知识。至他国者喻於诸天。杀群贼者喻得须陀洹强断五欲并诸烦恼。遇彼王者喻遭值贤圣。国旧人等生嫉妒者，喻诸外道见有智者能断烦恼及以五欲。便生诽谤言无此事。远人激厉而言旧臣无能与共为敌者，喻於外道无敢抗冲。杀师子者喻破魔既断烦恼又伏恶魔。使得无著道果封赏。每常怖怯者喻能以弱而制於彊。其於初时虽无净心。然彼其施遇善知识便获胜报。不净之施犹尚如此。况复善心欢喜布施。是故应当於福

田所勤心修施。

卷四

口诵乘船法而不解用喻，夫妇食饼共为要喻，共相怨害喻，效其祖先急速食喻，尝菴婆罗果喻，为二妇故丧其两目喻，唵米决口喻，诈言马死喻，出家凡夫贪利养喻，驼瓮俱失喻，田夫思王女喻，构驴乳喻，与儿期早行喻，为王负机喻，倒灌喻，为熊所齧喻，比种田喻，猕猴喻月蚀打狗喻，妇女患眼痛喻，父取儿耳珰喻，劫盗分财喻，猕猴把豆喻，得金鼠狼喻，地得金钱喻，贫儿欲与富等财物喻，小儿得欢喜丸喻，老母捉熊喻，摩尼水窦喻，二鸽喻，诈称眼盲喻，为恶贼所劫失叠喻，小儿得大龟喻。

（六六）口诵乘船法而不解用喻。

昔有大长者子。共诸商人入海采宝。此长者子善诵入海捉船方法。若入海水漩湊洄流砥激之处。当如是捉如是正是住。语众人言入海方法我悉知之。众人闻已深信其语。既至海中未经几时船师遇病忽然便死。时长者子即便代处。至洄洑驶流之中唱言：当如是捉如是正。船盘回旋转不能前进至於宝所。举船商人没水而死。凡夫之人亦复如是，少习禅法安般数息及不净观。虽诵其文不解其义。种种方法实无所晓自言善解。妄授禅法使前人迷乱失心。倒错法相。终年累岁空无所获。如彼愚人使他没海。

（六七）夫妇食饼共为要喻。

昔有夫妇有三番饼。夫妇共分各食一饼。馀一番在共作要言：若有语者要不与饼。既作要已，为一饼故各不敢语。须臾有贼入家偷盗取其财物。一切所有尽毕贼手。夫妇二人以先要故眼看不语。贼见不语即其夫前侵略其妇。其夫眼见亦复不语。妇便唤贼语其夫言：云何痴人为一饼故见贼不唤。其夫拍手笑言：咄婢我定得饼不复与尔。世人闻之无不嗤笑。凡夫之人亦复如是，为小名利故诈现静默。为虚假烦恼种种恶贼之所侵略。丧其善法坠堕三涂。都不怖畏求出世道。方於五欲耽著嬉戏。虽遭大苦不以为患。如彼愚人等无有异。

（六八）共相怨害喻。

昔有一人。共他相瞋。愁忧不乐。有人问言：汝今何故愁悴如是，即答之言有人毁我力不能报。不知何方可得报之是以愁耳有人语言：唯有毗陀罗咒可以害彼。但有一患未及害彼返自害己。其人闻已便大欢喜。愿但教我虽当自害要望伤彼。世间之人亦复如是，为瞋恚故欲求毗陀罗咒。用恼於彼竟未害他。先为瞋恚反自恼害。堕於地狱畜生饿鬼。如彼愚人等无差别。

（六九）效其祖先急速食喻。

昔有一人从北天竺至南天竺。住止既久即聘其女共为夫妇。时妇为夫造设饮食。夫得急吞不避其热。妇时怪之语其夫言：此中无贼劫夺人者，有何急事匆匆乃尔不安徐食。夫答妇言有好密事不得语汝。妇闻其言谓有异法殷勤问之。良久乃答。我祖父已来法常速食。我今效之。是故疾耳。世间凡夫亦复如是，不达正理不知善恶。作诸邪行不以为耻。而云我祖父已来作如是法。至死受行。终不舍离。如彼愚人习其速食以为好法。

（七〇）尝菴婆罗果喻。

昔有一长者，遣人持钱至他园中。买菴婆罗果而欲食之。而敕之言好甜美者汝当买来。即便持钱往买其果。果主言我此树果悉皆美好无一恶者，汝尝一果足以知之。买果者言：我今当一一尝之然後当取。若但尝一何以可知。寻即取果一一皆尝持来归家。长者见已恶而不食。便一切都弃。世间之人亦复如是，闻持戒施得大富乐。身常安隐无有诸患。不肯信之。便作是言：布施得福。我自得时然後可信。目睹现世贵贱贫穷皆是先业所获果报。不知推一以求因果。方怀不信。须臾自经。一旦命终。财物丧失。如彼尝果一切都弃。

（七一）为二妇故丧其两目喻。

昔有一人聘取二妇。若近其一为一所瞋不能裁断。便在二妇中间正身仰卧。值天大雨屋舍霖漏。水土俱下堕其眼中。以先有要不敢起避。遂令二目俱失其明。世间凡夫亦复如是，亲近邪友习行非法。造作结业堕三恶道。长处生死丧智慧眼。如彼愚夫为其二妇故二眼俱失。

（七二）啖米决口喻。

昔有一人至妇家舍。见其捣米便往其所偷米啖之。妇来见夫欲共其语。满口中米都不应和。羞其妇故不肯弃之是以不语。妇怪不语以手摸看谓其口肿。语其父言我夫始来。卒得口肿都不能语。其父即便唤医治之。时医言曰此病最重。以刀决之可得差耳。即便以刀决破其口。米从中出其事彰露。世间之人亦复如是，作诸恶行犯於净戒。覆藏其过不肯发露。堕於地狱畜生饿鬼。如彼愚人以小羞故不肯吐米。以刀决口乃显其过。

（七三）诈言马死喻。

昔有一人骑一黑马入阵击贼。以其怖故不能战斗。便以血污涂其面目。诈现死相卧死人中。其所乘马为他所夺。军众既去便欲还家。即截他人白马尾来。既到舍已有人问言：汝所乘马今为所在何以不乘。答言：我马已死遂持尾来。傍人语言：汝马本黑尾。何以白。默然无对。为人所笑。世间之人亦复如是，自言善好修行慈心不

食酒肉。然杀害众生加诸楚毒。妄自称善无恶不造。如彼愚人诈言马死。

（七四）出家凡夫贪利养喻。

昔有国王设於教法诸有婆罗门等。在我国内制抑洗净不洗净者，驱令策使种种苦役。有婆罗门空捉澡灌。诈言：洗净人为其著水即便泻弃。便作是言我不洗净王自洗之。为王意故用避王役。妄言洗净实不洗之。出家凡夫亦复如是，剃头染衣内实毁禁。诈现持戒望求利养。复避王役。外似沙门。内实虚欺。如捉空瓶但有外相。

（七五）驼瓮俱失喻。

昔有一人先瓮中盛穀。骆驼入头瓮中食穀又不得出。既不得出以为忧恼。有一老人来语之言：汝莫愁也。我教汝出。汝用我语必得速出。汝当斩头自得出之。即用其语以刀斩头。既复杀驼而复破瓮。如此痴人世间所笑。凡夫愚人亦复如是，恚心菩提志求三乘。宜持禁戒防护诸恶。然为五欲毁破净戒。既犯禁已舍离三乘。纵心极意无恶不造。乘及净戒二俱捐舍。如彼愚人驼瓮俱失。

（七六）田夫思王女喻。

昔有田夫游行城邑。见国王女颜貌端正所希有。昼夜想念情不能已，思与交通无由可遂。颜色瘀黄即成重病。诸所亲见便问其人何故如是，答亲里言我昨见王女。颜貌端正思与交通不能得故是以病耳。我若不得必死无疑。诸亲语言我当为汝作好方便。使汝得之勿得愁也。後日见之便语之言：我等为汝便为是得。唯王女不欲。田夫闻之欣然而笑谓呼必得。世间愚人亦复如是，不别时节春秋冬夏。便於冬时掷种土中望得果实。徒丧其功空无所获。芽茎枝叶一切都失。世间愚人修习少福谓为具足。便谓菩提已可证得。如彼田夫悵望王女。

（七七）构驴乳喻。

昔边国人不识於驴。闻他说言驴乳甚美都无识者，尔时诸人得一父驴。欲构其乳。诤共捉之。其中有捉头者有捉耳者，有捉尾者有捉脚者，复有捉器者各欲先得於前饮之。中捉驴根谓呼是乳。即便构之望得其乳。众人疲厌都无所得。徒自劳苦空无所获。为一切世人之所嗤笑。外道凡夫亦复如是，闻说於道不应求处。妄生想念。起种种邪见裸形自饿投岩赴火以是邪见堕於恶道。如彼愚人妄求於乳。

（七八）与儿期早行喻。

昔有一人。夜语儿言：明当共汝至彼聚落有所取索。儿闻语已至明旦竟不问父独往诣彼。既至彼已，身体疲极空无所获。又不得食饥渴欲死。寻复回来来见其父。父

见子来深责之言：汝大愚痴无有智慧。何不待我空自往来。徒受其苦。为一切世人之所嗤笑。凡夫之人亦复如是，设得出家即剃须发服三法衣。不求明师谘受道法。失诸禅定道品功德。沙门妙果一切都失。如彼愚人虚作往返徒自疲劳。形似沙门实无所得。

（七九）为王负机喻。

昔有一王。欲入无忧园中欢娱受乐。敕一臣言汝捉一机。持至彼园我用坐息。时彼使人羞不肯捉。而白王言：我不能捉。我愿担之。时王便以三十六机置其背上。驱使担之至於园中。如是愚人为世所笑。凡夫之人亦复如是，若见女人一发在地。自言持戒不肯捉之。後为烦恼所惑。三十六物发毛爪齿屎尿不净不以为鬼。三十六物一时都捉不生惭愧。至死不舍。如彼愚人担负於机。

（八〇）倒灌喻。

昔有一人。患下部病。医言：当须倒灌乃可差耳。便集灌具欲以灌之。医未至顷便取服之。腹胀欲死不能自胜。医既来至怪其所以。即便问之。何故如是，即答医言：向时灌药我取服之。是故欲死。医闻是语深责之言：汝大愚人不解方便。即便以馀药服之。方吐下尔乃得差。如此愚人为世所笑。凡夫之人亦复如是，欲修学禅观种种方法。应效不净。反效数息。应数息者效观六界。颠倒上下无有根本。徒丧身命为其所困。不谘良师颠倒禅法。如彼愚人饮服不净。

（八一）为熊所啗喻。

昔有父子与伴共行。其子入林为熊所啗。爪坏身体。困急出林还至伴边。父见其子身体伤坏怪问之言：汝今何故被此疮害。子报父言：有一种物。身毛毳毼来毁灭我。父执弓箭往到林间。见一仙人。毛发深长。便欲射之。傍人语言：何故射之。此人无害当治有过。世间愚人亦复如是，为彼虽著法服无道行者之所骂辱。而滥害良善有德之人。喻如彼父熊伤其子而枉加神仙。

（八二）比种田喻。

昔有野人。来至田里。见好麦苗生长郁茂。问麦主言：云何能令是麦茂好。其主答言：平治其地。兼加粪水故得如是，彼人即便依法用之。即以水粪调和其田下种於地。畏其自脚蹋地令坚其麦不生。我当坐一床上使人輿之於上散种尔乃好耳。即使四人人擎一脚至田散种。地坚逾甚为人嗤笑。恐己二足更增八足。凡夫之人亦复如是，既修戒田善芽将生。应当师谘受行教诫。令法芽生。而返违犯。多作诸恶便使戒芽不生。喻如彼人畏其二足倒加其八。

（八三）猕猴喻。

昔有一猕猴。为大人所打。不能奈何。反怨小儿。凡夫愚人亦复如是，先所瞋人代谢不停灭在过去。乃於相续後生之法谓是前者，妄生瞋忿毒害弥深。如彼痴猴为大所打反嗔小儿。

（八四）月蚀打狗喻。

昔阿修罗王。见日月明净以手障之。无智常人狗无罪咎横加於恶。凡夫亦尔。贪瞋愚痴横苦其身。卧棘刺上五热炙身。如彼月蚀枉横打狗。（八五）妇女患眼痛喻。

昔有一女人。极患眼痛。有知识女人问言：汝眼痛耶。答言眼痛。彼女复言有眼必痛。我虽未痛并欲挑眼恐其後痛。傍人语言眼若在者或痛不痛。眼若无者终身长痛。凡愚之人亦复如是，闻富贵者衰患之本。畏不布施恐後得报。财物殷溢重受苦恼。有人语言汝若施者或苦或乐。若不施者贫穷大苦。如彼女人不忍近痛便欲去眼乃为长痛。

（八六）父取儿耳珰喻。

昔有父子二人缘事共行。路贼卒起欲来剥之。其儿耳中有真金珰。其父见贼卒发畏失耳珰。即便以手挽之。耳不时决为耳珰故。便斩儿头。须臾之间贼便弃去。还以儿头著於肩上不可平复。如是愚人为世间所笑。凡夫之人亦复如是，为名利故造作戏论。言二世有二世无。中阴有中阴无。心数法有心数法无。种种妄想不得法实。他人以如法论破其所论。便言：我论中都无是说。如是愚人为小名利。便故妄语丧沙门道果。身坏命终堕三恶道。如彼愚人为少利故斩其儿头。

（八七）劫盗分财喻。

昔有群贼共行劫盗。多取财物即共分之等以为分。唯有鹿野钦婆罗色不纯好。以为下分与最劣者，下劣者得之悲恨。谓呼大失。至城卖之。诸贵长者多与其价。一人所得倍於众伴。方乃欢喜踊悦无量，犹如世人不知布施有报无报。而行少施得生天上。受无量乐方更悔恨悔不广施。如钦婆罗後得大价。乃生欢喜施亦如是，少作多得。尔乃自庆恨不益为。

（八八）猕猴把豆喻。

昔有一猕猴。持一把豆。误落一豆在地。便舍手中豆欲觅其一。未得一豆先所舍者鸡鸭食尽。凡夫出家亦复如是，初毁一戒而不能悔。以不悔故放逸滋蔓一切都舍。

如彼猕猴失其一豆一切都弃。

（八九）得金鼠狼喻。

昔有一人在路而行。道中得一金鼠狼。心生喜踊持置怀中。涉道而进至水欲渡。脱衣置地。寻时金鼠变为毒蛇。此人深思宁为毒蛇螫杀要当怀去。心至冥感。还化为金。傍边愚人见其毒蛇变成真实。谓为恒尔。复取毒蛇内著怀里。即为毒蛇之所螫。螫丧身殒命。世间愚人亦复如是，见善获利内无真心。但为利养来附於法。命终之後堕於恶处。如捉毒蛇被螫而死。

（九〇）地得金钱喻。

昔有贫人在路而行。道中偶得一囊金钱。心大喜跃即便数之数未能周。金主忽至。尽还夺钱。其人当时悔不疾去。懊恼之情甚为极苦。遇佛法者亦复如是，虽得值遇三宝福田。不勤方便修行善业。忽尔命终堕三恶道。如彼愚人还为其主夺钱而去。如偈所说，

今日营此事，明日造彼事。乐著不观苦，不觉死贼至。匆匆营众务，凡人无不尔。如彼数钱者，其事亦如是，

（九一）贫儿欲与富等财物喻。

昔有一贫人少有财物。见大富者意欲共等。不能等故。虽有少财欲弃水中。傍人语言：此物虽鲜可得延君性命数日。何故舍弃掷著水中。世间愚人亦复如是，虽得出家少得利养。心有希望常怀不足。不能得与高德者等。获其利养见他宿旧有德之人。素有多闻多众供养。意欲等之不能等故。心怀忧苦便欲罢道。如彼愚人欲等富者自弃己财。

（九二）小儿得欢喜丸喻。

昔有一乳母抱儿涉路。行道疲极眠睡不觉。时有一人持欢喜丸授与小儿。小儿得已贪其美味不顾身物。此人即时解其钳锁婴珞衣物都尽持去。比丘亦尔。乐在众务惯闹之处。贪少利养为烦恼贼夺其功德戒宝婴珞。如彼小儿贪少味故一切所有贼尽持去。

（九三）老母捉熊喻。

昔有一老母在树下卧熊欲来搏。尔时老母绕树走避。熊寻後逐一手抱树欲捉老母。老母得急即时合树捺熊两手。熊不得动更有异人来至其所。老母语言：汝共我捉杀

分其肉。时彼人者信老母语。即时共捉既捉之已老母即便舍熊而走。其人後为熊所困。如是愚人为世所笑。凡夫之人亦复如是，作诸异论既不善好。文辞繁重多有诸病。竟不成讫便舍终亡。後人捉之欲为解释。不达其意。反为其困。如彼愚人代他捉熊反自被害。

（九四）摩尼水窦喻。

昔有一人。与他妇通。交通未竟夫从外来。即便觉之住於门外。伺其出时便欲杀害。妇语人言：我夫已觉。更无出处。唯有摩尼可以得出（摩尼者齐云水窦孔也）。欲令其人从水窦出。其人错解谓摩尼珠。所在求觅。而不知处。即作是言：不见摩尼珠我终不去。须臾之间为其所杀。凡夫之人亦复如是，有人语言：生死之中无常苦空无我离断常二边。处於中道。於此中过可得解脱。凡夫错解便求世界有边无边及以众生有我无我。竟不能观中道之理。忽然命终为於无常之所杀害堕三恶道。如彼愚人推求摩尼为他所害。

（九五）一鸽喻。

昔有雄雌二鸽共同一巢。秋果熟时取果满巢。於其後时果乾减少唯半巢在。雄瞋雌言：取果勤苦汝独食之唯有半在。雌鸽答言：我不独食。果自减少。雄鸽不信。瞋恚而言：非汝独食何由减少。即便以觜啄雌鸽杀。未经几日。天降大雨。果得湿润还复如故。雄鸽见已方生悔恨。彼实不食。我妄杀他。即悲鸣命唤雌鸽汝何处去。凡夫之人亦复如是，颠倒在怀。妄取欲乐不观无常。犯於重禁悔之於後竟何所及。後唯悲叹如彼愚鸽。

（九六）诈称眼盲喻。

昔有工匠师。为王作务不堪其苦。诈言眼盲便得脱苦。有馀作师。闻之便欲自坏其目用避苦役。有人语言：汝何以自毁。徒受其苦。如是愚人为世人所笑。凡夫之人亦复如是，为少名誉及以利养。便故妄语毁坏净戒。身死命终堕三恶道。如彼愚人为少利故自坏其目。

（九七）为恶贼所劫失鬘喻。

昔有二人为伴共行旷野。一人被一领鬘中路为贼所剥。一人逃避走入草中。其失鬘者先於鬘头裹一金钱。便语贼言：此衣適可直一枚金钱。我今求以一枚金钱而用赎之。贼言金钱今在何处。即便鬘头解取示之。而语贼言：此是真金。若不信我语今此草中有好金师可往问之。贼既见之复取其衣。如是愚人鬘与金钱一切都失。自失其利复使彼失。凡夫之人亦复如是，修行道品作诸功德。为烦恼贼之所劫掠。失其善法丧诸功德。不但自失其利复使余人失其道业。身坏命终堕三恶道。如彼愚人彼

此俱失。

（九八）小儿得大龟喻。

昔有一小儿。陆地游戏得一大龟。意欲杀之不知方便。而问人言云何得杀。有人语言：汝但掷置水中即时可杀。尔时小儿信其语故即掷水中。龟得水已即便走去。凡夫之人亦复如是，欲守护六根修诸功德不解方便。而问人言作何因缘而得解脱。邪见外道天魔波旬。及恶知识而语之言：汝但极意六尘恣情五欲。如我语者必得解脱。如是愚人不谛思惟。便用其语身坏命终堕三恶道。如彼小儿掷龟水中。

此论我所造，合和喜笑语。多损正实说，观义应不应。如似苦毒药，和合於石蜜。药为破坏病，此论亦如是，

正法中戏笑，譬如彼狂药。佛正法寂定，明照於世间。如服吐下药，以酥润体中。我今以此义，显发於寂定。

如阿伽陀药，树叶而裹之。取药涂毒竟，树叶还弃之。戏笑如叶裹，实义在其中。智者取正义，戏笑便应弃。

尊者僧伽斯那造作痴花鬘竟。